



OBRTNIČKA KOMORA KANTONA SARAJEVO

STATUT

OBRTNIČKE KOMORE KANTONA SARAJEVO

Sarajevo, 21. mart 2015. godine

Na osnovu čl. 84.,86.,87. i 89. Zakona o obrtu i srodnim djelatnostima ("Službene novine Federacije Bosne i Hercegovine", br. 35/09 i 42/11), Skupština Obrtničke komore Kantona Sarajevo na sjednici održanoj dana 21.03. 2015. godine d o n o s i

S T A T U T OBRTNIČKE KOMORE KANTONA SARAJEVO

I. OPŠTE ODREDBE

Član 1.

Obrtnička Komora Kantona Sarajevo (u daljem tekstu Komora) je samostalna, nevladina, javno-pravna, stručno poslovna organizacija obrtnika koji u skladu sa Zakonom o obrtu (u daljem tekstu: Zakon) obavljaju obrt i srodne djelatnosti. Komora u skladu sa Zakonom i propisima donesenim na osnovu Zakona zastupa i štiti interese obrtnika i lica koja obavljaju srodne djelatnosti, predstavlja ih pred kantonalnim i općinskim tijelima vlasti, kantonalnim i općinskim tijelima uprave, kao i drugim tijelima u zemlji i u inostranstvu.

Član 2.

Ovim Statutom detaljnije se utvrđuju poslovi, zadaci i obaveze Komore, utvrđuju se prava, obaveze i odgovornost članova Komore, oblici organizovanja i rada, način upravljanja, poslovi i zadaci u vezi obrazovanja za potrebe obrtništva, saradnja sa Komorama u zemlji i u inostranstvu, kao i sličnim asocijacijama, javnost rada-način informisanja, način finansiranja Komore, i ostalo potrebno za rad Komore.

II. PRAVNI POLOŽAJ KOMORE

Član 3.

Komora je pravni subjekt s pravima i obavezama, a čine je fizička lica - obrtnici i lica koja obavljaju srodne djelatnosti.

Komora obuhvata područje devet općina sa Kantona Sarajevo: Cenatar-Sarajevo, Novo Sarajevo-Sarajevo, Novi Grad-Sarajevo, Stari Grad-Sarajevo, Vogošća, Ilidža, Hadžići, Trnovo i Ilijaš.

Komora obavlja svoju djelatnost izvan uticaja političkih stranaka.

Član 4.

Članstvo u Komori je obavezno.

Članovima Komore postaju obrtnici-zanatlije na području Kantona Sarajevo, na čijem teritoriju se nalazi njihovo sjedište, danom upisa u Obrtni registar.

Članovi Komore su ujedno i članovi Obrtničke Komore Federacije BiH i svoja prava u toj Komori ostvaruju preko Komore, na način utvrđen Zakonom i ovim Statutom.

Članovima Komore mogu postati i trgovačka i privredna društva i druga pravna lica, osnovana po drugim zakonima, na osnovu dobrovoljnosti, potpisivanjem pristupnice i redovnim uplaćivanjem članarine.

Član 5.

Članstvo u Komori prestaje sa danom brisanja iz Obrtnog registra, dok za pravna lica prestaje na osnovu odluke nadležnog tijela Komore.

Član 6.

Komora za svoje obaveze odgovara cjelokupnom svojom imovinom.

Član 7.

Naziv Komore je : Obrtnička Komora Kantona Sarajevo.

Skraćeni naziv je : OKKS.

Privremeno sjedište Komore je u Sarajevu, u ulici Čobanija 18-20.

Član 8.

Komora ima svoje pečate, te okrugli žig s tekstom po rubu kruga pečata i žiga natpis: Obrtnička komora Kantona – Sarajevo u sredini žiga zaštitni znak Komore.

Član 9.

Komora ima javne ovlasti koje su utvrđene zakonom i drugim kantonalnim propisima.

Akti koje Komora izdaje u obavljanju javnih ovlasti su javne isprave.

Član 10.

Aktivnosti Komore koje budu od posebnog značaja za obrt objavljuvat će se najmanje u jednim dnevnim novinama, kao i putem elektronskog informisanja javnosti.

III. ZADACI I POSLOVI KOMORE

Član 11.

Komora u skladu sa Zakonom:

- Unapređuje obrt i srodne djelatnosti,
- Obavlja poslove iz područja obrazovanja i osposobljavanja za potrebe obrtništva,
- Utemeljuje Arbitražno vijeće,
- Izdaje potvrde o porijeklu proizvoda ako za te potvrde nije nadležna neka druga institucija,
- Zastupa i štiti interese obrtnika, svojih članova pred tijelima kantonalne vlasti i tijelima kantonalne i opštinske uprave,
- Daje primjedbe i prijedloge tijelima kantonalne vlasti i tijelima kantonalne uprave kod donošenja propisa od interesa za obrtnike i obrtništvo,
- Sudjeluje u radu radnih grupa kod izrade zakonskih i podzakonskih prijedloga,
- Daje mišljenje i upućuje inicijative u izradi prijedloga zakona i podzakonskih akata,
- Daje saglasnost na Statut udruženja obrtnika u skladu sa Članom 67. Zakona o obrtu i srodnim djelatnostima,
- Pokreće postupak gašenja udruženja u skladu sa Članom 79. Zakona o obrtu i srodnim djelatnostima,
- i ostalo

Član 12.

Komora daje upute, stručna mišljenja, savjete i ostalo potrebno za otvaranje obrta, budućih obrtnika u skladu sa Zakonom.

Član 13.

Komora obavlja sve potrebne radnje po pitanju obrazovanja i osposobljavanja za potrebe izvođenja praktičnog dijela ispita, predlaže majstore u komisije za polaganje majstorskih ispita, te osniva i druge komisije za potrebe obrtnika.

Član 14.

Komora vodi evidenciju obrtnika, unapređuje organizovanje strukovnog obrazovanja putem seminara i izdavačke djelatnosti iz oblasti obrtništva za svoje članove.

Član 15.

Komora pronalazi najpovoljniji način povezivanja svojih članova sa finansijskim institucijama radi korištenja kreditnih sredstava, radi podsticanja proizvodnje i usluga, zapošljavanja novih radnika kod obrtnika, te izučavanja obrtničke djelatnosti kod obrtnika.

Član 16.

Komora podstiče dualni sistem obrazovanja kod izučavanja obrtničkih djelatnosti, inicira donošenje novih propisa u oblasti školstva u okviru obrtničke djelatnosti.

Član 17.

Komora u saradnji sa organima vlasti angažuje se na slijedećim zadacima:

- inicira razvojne projekte u svrhu otvaranja novih obrtničkih radionica pri Komori ili odvojeno,
- inicira izučavanje i očuvanje tradicionalnih zanatskih obrta i srodnih djelatnosti u skladu sa Zakonom o obrtu i srodnim djelatnostima,
- inicira očuvanje kulturne baštine BiH i obrtništva
- organizuje izložbe, sajmove i prezentaciju obrtništva u zemlji i inostranstvu,
- inicira i podstiče otvaranje tehnoloških parkova i zanatskih centara za potrebe obrta,
- ostvaruje saradnju sa sličnim asocijacijama u zemlji i inostranstvu radi unapređenja obrta kroz partnerske odnose na projektima koji unapređuju razvoj obrtništva i obrta,
- u cilju unapređenja obrtništva i obrta poduzima sve neophodne radnje u skladu sa zakonima, svojim ovlastima i programskim aktivnostima,
- izrađuje etički kodeks ponašanja obrtnika u Kantonu Sarajevo,
- pokreće inicijativu kod nadležnog ministarstva za izmjenu i dopunu Zakona o carinskim tarifama i podzakonskih akata proisteklih iz tog Zakona

IV. PRAVA, OBAVEZE I ODGOVORNOSTI ČLANOVA

Član 18.

Članovi Komore imaju pravo da:

- biraju i da budu birani u organe Komore ukoliko su registrirani obrtnici,
- upravljaju Komorom putem nadležnih organa,
- sudjeluju u radu putem svojih strukovnih savjeta,
- sudjeluju u implementaciji dualnog obrazovanja za potrebe obrtništva,
- sudjeluju u iznalaženju najpovoljnijih rješenja za provođenje zajedničkih interesa obrtnika,
- koriste se stručnom i drugom pomoći iz oblasti rada Komore.

Članovi Komore obavezni su da :

- poštuju zakone i pozitivna zakonska rješenja,
- učestvuju u radu organa i tijela Komore u koja su izabrani,
- redovno izmiruju članarinu koju odrede nadležna tijela,
- dosljedno provode usvojeni program Komore.

Članovi Komore odgovorni su za :

- neizvršavanje donesenih odluka Komore,
- neobavljanje poslova i zadataka u skladu sa Zakonom i ovim Statutom,
- neizmirenje članarine u periodu dužem od šest mjeseci,
- neizvršavanje povjerenih zadataka od strane organa Komore,
- narušavanje međuljudskih odnosa i dobrih poslovnih običaja,
- nelojalna konkurencija, nedolično i nasilno ponašanje.

V. ORGANI KOMORE

Član 19.

Organi Komore su:

1. Skupština Komore,
2. Upravni odbor Komore,
3. Nadzorni odbor Komore.

V-1. SKUPŠTINA KOMORE

Član 20.

Skupština Komore broji 21 član i najviši je organ upravljanja Komorom, a sačinjavaju je obrtnici sa područja devet općina sa sjedištem obrtničkih radnji na području Kantona Sarajevo, lica koja obavljaju srodne djelatnosti, kao i predstavnici pravnih subjekata koji osiguravaju srazmjernu teritorijalnu i strukovnu zastupljenost obrtnika u mjeri u kojoj je to moguće ostvariti, i to sa svake općine kako slijedi:

- Opština Stari Grad ----- 3 člana
- Opština Centar ----- 4 člana
- Opština Novo Sarajevo --- 3 člana
- Opština Novi Grad ----- 3 člana
- Opština Ilidža ----- 2 člana
- Opština Vogošća ----- 2 člana
- Opština Hadžići ----- 2 člana
- Opština Ilijaš ----- 1 član
- Opština Trnovo ----- 1 član

Obrtnička komora Kantona Sarajevo ima obavezu da prilikom izbora predstavnika u Skupštinu Komore i druga tijela raspiše javni poziv.

Skupština ima predsjednika i dva dopredsjednika Skupštine, koji se biraju iz saziva članova Skupštine na svojoj sjednici.

Skupštinu zakazuje i njome predsjedava predsjednik Skupštine.

Skupština Komore zakazuje se prema potrebi, a najmanje jedanput godišnje.

Skupština Komore će se održati ako to zahtjevaju Upravni odbor Komore, Nadzorni odbor Komore, predsjednik Komore ili najmanje jedna trećina članova Skupštine.

Član 21.

Sastav i način izbora predstavnika u Skupštinu i organe Komore, treba uzeti u obzir podatke o stručnosti, iskustvu u obrtničkoj djelatnosti, afirmaciji u obrtništvu te voditi računa o nacionalnoj, polnoj i starosnoj zastupljenosti kandidata, u mjeri u kojoj je to moguće ostvariti.

Član 22.

Predsjednik Skupštine priprema i zakazuje sjednice, rukovodi radom i brine se o održavanju reda na sjednici, potpisuje akta o sjednici i akta donesena na sjednici. U pripremi i zakazivanju sjednica Skupštine predsjednik Skupštine surađuje sa predsjednikom Komore, predsjednikom Upravnog Odbora Komore i sekretarom Komore.

Predsjednik Komore, kao i predsjednik UO Komore, imaju pravo i dužnost da pomažu predsjedniku Skupštine u pripremi, zakazivanju i vođenju sjednice Skupštine, kao i da učestvuje u radu sjednice Skupštine, bez prava odlučivanja kada se odlučuje o njihovom radu.

Član 23.

Mandat predstavnika u Skupštini traje četiri godine sa pravom ponovnog izbora. Mandat predstavnika u Skupštini prestaje prije roka na koji je izabran:

- ukoliko je brisan iz obrtnog registra,
- gubitkom statusa člana Komore,
- ostavkom,
- smrću,
- ako je počinio krivično djelo.

Skupština za svakog svog redovnog člana ima zamjenskog člana, njih ukupno 21, koji su u izbornoj proceduri po istim kriterijima o teritorijalnoj i drugoj zastupljenosti birani za zamjenskog člana.

Član 24.

Skupština Komore:

Donosi:

- Statut, vrši izmjene i dopune Statuta,
- Pravilnik o radu Skupštine,
- Program rada i finansijski plan,
- Prijedlog o visini članarine,
- Propise o raspolaganju budžetom, kasom i računom,

- Odluke o kontroli završnog godišnjeg računa i odluke o tome koja će, nezavisna institucija vršiti njegovu kontrolu,
- Odluke o sticanju i prodaji nepokretne imovine,
- Pravilnik o načinu izdavanja licenci, te načinu izvođenja praktičnog obrazovanja,
- Pravilnik o vođenju evidencije o majstorskim ispitima,
- Odluka o raspisivanju i provođenju izbora u organe Komore,
- Sve pravilnike i poslovnike potrebne za rad Komore,
- Odluku o kriterijima i načinu izbora predstavnika u Skupštinu Komore,
- Ostale akte iz svoje nadležnosti.

Utvrđuje:

- ekonomsku politiku Komore,
- način prikupljanja potrebnih sredstava za rad Komore

Prihvaća:

- godišnji Izvještaj po završnom računu i Izvještaje o radu Nadzornog odbora Komore, Predsjednika Komore, Upravnog odbora Komore i Suda časti

Usklađuje:

- rad i razvoj Strukovnih savjeta na Kantonu Sarajevo

Imenuje i razrješava:

- predsjednika i dva dopredsjednika Skupštine
- Upravni odbor
- Nadzorni odbor
- predsjednika i dva dopredsjednika Komore
- Sud časti

Član 25.

Skupština Komore može punovažno odlučivati ukoliko sjednici prisustvuje više od polovine članova Skupštine.

Svaki član ima pravo na jedan glas uključujući i pravno lice.

Skupština donosi punovažno odluke natpolovičnom većinom prisutnih članova.

Iznimno kada se odlučuje o Statutu, raspisivanju izbora, imenovanju i razrješavanju članova Skupštine i članova u organima i tijelima Komore potrebna je dvotrećinska većina ukupnog saziva Skupštine.

Član Skupštine ima pravo na izdvojeno mišljenje ukoliko nije zadovoljan odlukom Skupštine.

Sve odluke Skupštine se donose javnim glasanjem.

Članovima Skupštine Komore pripada posebna naknada koja se određuje Pravilnikom o naknadama u organima Komore.

Rad Skupštine uređuje se Poslovníkom o radu Skupštine.

Poslovník o radu Skupštine donosi Skupština na svojoj konstituirajućoj sjednici.

V-2. UPRAVNI ODBOR KOMORE

Član 26.

Komora ima Upravni odbor, koji se sastoji od 5 članova.

Članovi Upravnog odbora su obrtnici – zanatlije, kao i lica koja obavljaju obrt i srodne djelatnosti, a koje je izabrala Skupština Komore.

Broj izabраниh članova treba osiguravati adekvatnu zastupljenost obrtnika sa područja svih opština Kantona Sarajevo u mjeri koliko je to moguće ostvariti .

Upravni odbor ima predsjednika Upravnog odbora i dopredsjednika Upravnog odbora koji se biraju iz saziva članova Upravnog odbora na svojoj konstituirajućoj sjednici.

U radu Upravnog odbora, bez prava odlučivanja, mogu sudjelovati predsjednik Komore, a po potrebi i ostali predstavnici u organima i tijelima Komore.

Član 27.

Mandat članova Upravnog odbora traje četiri godine, a može prestati opozivom, ostavkom, smrću i gubitkom članstva u Komori.

Članovi Upravnog odbora mogu biti birani na još jedan mandat.

Sjednicu Upravnog odbora saziva po potrebi i njome predsjedava Predsjednik Upravnog odbora, a u njegovj odsutnosti dopredsjednik Upravnog odbora. Upravni odbor radi po sjednicama.

Članovima Upravnog odbora Komore pripada posebna naknada koja se određuje Pravilnikom o plaćama i nadoknadama u organima Komore.

Član 28.

Upravni odbor u svojoj nadležnosti: sprovodi odluke i zaključke Skupštine, poslove i zadatke koje mu naloži Skupština, inicira izradu prijedloga pravilnika, predlaže imenovanje i razrješenje pojedinih članova Stručne službe, o kojima odluku donosi Skupština, izrađuje Pravilnik o službenim putovanjima članova Komore, te odlučuje o svim pitanjima koja se tiču poslovanja Komore.

Rad Upravnog odbora, kao i njegove nadležnosti i zadaci koji su taksativno pobrojani, uređuju se Poslovnikom o radu Upravnog odbora.

Poslovnik o radu Upravnog odbora donosi Upravni odbor na svojoj konstituirajućoj sjednici.

Upravni odbor donosi pravosnažne odluke ako sjednici prisustvuje više od polovine članova Upravnog odbora.

Predsjednik Upravnog odbora Komore podnosi Skupštini Komore Izvještaj o radu Upravnog Odbora Komore najmanje jedanput godišnje, a po potrebi i češće.

V-3. NADZORNI ODBOR KOMORE

Član 29.

Nadzorni odbor ima tri člana , koje bira Skupština iz redova saziva skupštine. Nadzorni odbor ima predsjednika i dva člana koji se biraju na svojoj konstituirajućoj sjednici.

Isto lice ne može istovremeno biti član Nadzornog i Upravnog odbora.

Članovima Nadzornog odbora Komore pripada posebna naknada koja se određuje Pravilnikom o nadoknadama u organima Komore.

Član 30.

Nadzorni odbor nadzire : materijalno i finansijsko poslovanje Komore, izvršavanje obaveza Stručne službe, te prati provođenje Statuta.

Rad Nadzornog odbora uređuje se Poslovníkom o radu Nadzornog odbora.

Poslovník o radu Nadzornog odbora donosi Nadzorni odbor na svojoj konstituirajućoj sjednici Nadzornog odbora.

Član 31.

Sjednicu Nadzornog odbora saziva i njome predsjedava predsjednik Nadzornog odbora, a u njegovoj spriječenosti potpredsjednik Nadzornog odbora .

Nadzorni odbor podnosi Skupštini pismeni izvještaj o svom radu najmanje jedanput godišnje, a sastaje se po potrebi.

VI. PREDSJEDNIK KOMORE

Član 32.

Komora ima predsjednika i dva dopredsjednika koje imenuje i razrješava Skupština komore iz reda obrtnika koji su članovi Komore.

Mandat predsjednika i dopredsjednika komore je 4 (četiri godine) i mogu biti birani na još jedan mandatni period.

Predsjednik Komore za svoj rad odgovara Skupštini.

Član 33.

Predsjednik Komore podnosi finansijski plan na sjednici Skupštine OKKS na razmatranje i usvajanje i isti mora obuhvatiti: realno ekonomsko planiranje, aktivnosti OKKS, ukupne troškove organa i tijela Komore, uposlenih, povećanje produktivnosti, razvojne mogućnosti/kapaciteti, plan prihoda i rashoda u

narednom periodu tekuće godine, rebalans budžeta, te ostale stavke koje zahtijevaju sačinjavanje finansijskog plana i izradu budžeta na temelju ekonomskih principa, koje ovakvi (komorski oblici) pravni subjekti poslovanja moraju imati.

Član 34.

Predsjednik Komore predstavlja Komoru i odgovoran je za zakonitost akata Komore, brine se da rad tijela Komore bude u skladu sa Zakonom, ovim Statutom i interesima članova Komore.

Predsjednik Komore temeljem ovlasti koje su Zakonom prenešene na Komoru, potpisuje akte o provođenju javnih ovlasti.

Član 35.

Predsjednika Komore po isteku mandata, a nakon izuzetno uspješno obavljenih zadataka, koje mu nalaže Skupština u vrijeme trajanja njegovog mandata, te postignutih rezultata u razvoju obrtništva i obrta, ista može ponovo birati na novi mandatni period.

Predsjedniku i dopredsjednicima pripada posebna naknada koja se određuje Pravilnikom o nadoknadama u organima Komore.

Predsjedniku i dopredsjednicima Komore mandat prestaje razrješenjem po odluci Skupštine, ostavkom, smrću i gubitkom statusa člana Komore.

Član 36.

Neovisno od Članova 32. i 35. ovog Statuta Skupština Obrtničke Komore Kantona Sarajevo može ukoliko smatra svrsishodnim za efikasnije zastupanje interesa Komore i njeno djelovanje izabrati lice koje će profesionalno obavljati poslove Predsjednika Komore sa zasnivanjem radnog odnosa u Komori.

Lice izabrano u skladu sa stavom 1 ovog člana mora posjedovati organizacione i rukovodne sposobnosti u oblasti obrta.

Član 37.

Predsjednik Komore može svoje ovlasti, pismenim putem u određenom roku, prenijeti na sekretara ili druge osobe.

Član 38.

Predsjednik Komore potpisuje akte o provođenju odluka i zaključaka Skupštine, kao i ugovore u čijem zaključenju sudjeluje Komora.

Predsjednik Komore može koristiti faksimil potpisa.

Član 39.

Ukoliko predsjednik Komore ustanovi da je opšti ili neki drugi akt u suprotnosti sa Zakonom ili sa Statutom Komore upozoriće nadležni organ ili tijelo koje je donijelo takav akt i vratiti ga na ponovo odlučivanje.

Član 40.

Predsjednik Komore ima pravo sudjelovati u radu svih organa i tijela Komore, izuzev Nadzornog odbora.

Član 41.

Predsjednik Komore, uz saglasnost Upravnog odbora ima pravo pokrenuti postupak za utvrđivanje odgovornosti bilo kojeg člana u organima i tijelima OKKS.

Član 42.

Predsjednika Komore, ako je odsutan ili spriječen, po ovlasti predsjednika, zamjenjuje jedan od dopredsjednika.

Ako iz bilo kojih razloga predsjedniku Komore prestane funkcija, funkciju predsjednika će obavljati dopredsjednik koji je dobio veći broj glasova, do okončanja mandata na koji su predsjednici i dopredsjednici birani.

VII. SUD ČASTI KOMORE

Član 43.

Sud časti Komore broji tri člana koje bira Skupština OKKS iz redova saziva Skupštine.

Komora ima Sud časti koji djeluje u obavljanju svoje funkcije nezavisno i donosi odluke na osnovu Zakona, ovog Statuta i drugih akata Komore.

Član 44.

Naziv Suda je: Sud časti Obrtničke komore Kantona Sarajevo (u daljem tekstu Sud časti) koji odlučuje o:

- povredama Statuta,
- neizvršavanju obaveza članova Komore,
- povredama dobrih poslovnih običaja u obavljanju obrta,
- narušavanju odredaba kodeksa profesionalne etike,
- spora između predstavnika Komore.

Član 45.

Skupština Komore donosi pravilnik o organizaciji, sastavu, načinu izbora i nadležnosti Suda časti, te o postupku i mjerama koje on može izreći na osnovu prijedloga koje ponude organi i tijela Komore.

Član 46.

U komori može djelovati arbitraža.

Komora može, zbog smanjenja troškova, u saradnji sa Obrtničkom komorom Federacije BiH organizovati zajedničku arbitražu, čije odluke su izvršne među strankama.

Nadležnost, sastav, organizaciju arbitraže i pravila u postupku uređuju se pravilnikom koji donosi Upravni odbor Komore.

Član 47.

Rad Komore je javan, a ostvaruje se saradnjom sa sredstvima javnog informisanja na način kako je Pravilnikom o javnom informisanju i Zakonom o obrtu i srodnim djelatnostima regulisano.

Komora može osnovati i svoj list sa programskim načelima i sadržajem, sa utvrđenim međusobnim pravima i obavezama Komore i izdavača.

Ovaj član uređuje se pravilnikom kojeg donosi Skupština.

VIII. ZASTUPANJE U ORGANIMA OBRTNIČKE KOMORE FEDERACIJE BiH

Član 48.

Predstavnici koji su izabrani ispred Obrtničke komore Kantona Sarajevo u organe OK F BiH će štiti interese Obrtničke komore Kantona Sarajevo i obrtništva te ravnopravno učestvovati u odlučivanju u tijelima Obrtničke komore Federacije BiH. Predstavnici Obrtničke komore Kantona Sarajevo ne mogu biti zamjenjeni prije isteka mandata u organima OK FBiH u skladu sa Statutom Obrtničke komore F BiH, osim u slijedećim slučajevima:

- povodom smrti predstavnika,
- usljed teške bolesti,
- podnošenjem ostavke,
- gubitkom statusa obrtnika (na osnovu odluke OK FBiH).

Obrtnička komora Kantona Sarajevo delegira pet predstavnika u Obrtničku Komoru Federacije BiH, vodeći računa o strukovnoj, brojčanoj, teritorijalnoj i nacionalnoj zastupljenosti.

IX. STRUKOVNI SAVJETI

Član 49.

Radi usklađivanja i rješavanja stručnih pitanja od zajedničkog interesa , mogu se organizovati strukovni savjeti Komore.

Strukovni savjeti Komore se organizuju tako da strukovne grupe u pravilu sačinjavaju Strukovni savjet Komore. Vrsta i broj Strukovnih savjeta Komore se utvrđuju Poslovníkom o radu koji donosi Upravni odbor, a način rada aktom Komore.

Član 50.

Na nivou Komore, Strukovni Savjeti koji povezuju članove koji obavljaju istu ili sličnu djelatnost su:

1. Strukovni savjet proizvodnog obrta,
2. Strukovni savjet tekstilaca,
3. Strukovni savjet kožara,
4. Strukovni savjet metalske struke,
5. Strukovni savjet elektro struke,
6. Strukovni savjet instalatera,
7. Strukovni savjet građevinara,
8. Strukovni savjet drvoprerađivača,
9. Strukovni savjet prikupljanja ljekovitog bilja i gljiva,
10. Strukovni savjet uslužnog obrta,
11. Strukovni savjet domaće radinosti,
12. Strukovni savjet prevoznika,
13. Strukovni savjet za poljoprivredu i ribarstvo,
14. Strukovni savjet frizera i kozmetičara,
15. Strukovni savjet starih i tradicionalnih zanata,
16. Strukovni savjet autotaksista,
17. Strukovni savjet za obnovu i restauraciju istorijskih spomenika i drugog kulturnog naslijeđa.

O formiranju novih strukovnih savjeta Odluku donosi Upravni odbor.

Član 51.

Zadaci ovih strukovnih savjeta Komore su unapređenje djelatnosti te usklađivanje i zastupanje interesa članova Komore koji obavljaju istu ili sličnu djelatnost.

Način rada Strukovnih savjeta Komore utvrđuje se Pravilnikom koji donosi Upravni odbor Komore, a za provođenje istog ovlašteni su sekretari strukovnih savjeta.

X. SEKRETAR KOMORE

Član 52.

Komora ima sekretara koji je u stalnom radnom odnosu i bira se po redovnoj zakonskoj proceduri.

Za sekretara Komore može biti izbrano lice koje ima odgovarajuću stručnu spremu, poznaje rad na računaru, posjeduje organizacijsku i stručnu sposobnost za uspješno obavljanje poslova.

Ostale kriterij izbora sekretara uređuje Upravni odbor.

Član 53.

Sekretar Komore odgovoran je za provođenje poslovne politike organa i tijela Komore, izvršavanju njihovih odluka, zaključaka i drugih akata.

Sekretar Komore organizuje i usklađuje rad organa i tijela Komore, rukovodi radom stručne službe Komore, te obavlja druge poslove za koje ga ovlasti Upravni odbor i Predsjednik Komore.

Član 54.

Sekretar Komore zastupa Komoru u imovinskim i drugim poslovima, te je radnik s posebnim ovlaštenjima datim na određeni vremenski period po ovlaštenju Predsjednika Komore.

Član 55.

Sekretar Komore preko stručne službe Komore osigurava saradnju u radu svih udruženja obrtnika, obrtničkih komora kantona FBiH, Obrtničke komore Federacije BiH, te ostalih relevantnih institucija u zemlji i inostranstvu.

Član 56.

Sekretar Komore za svoj rad odgovara Upravnom odboru.

XI. STRUČNA SLUŽBA KOMORE

Član 57.

Za što stručnije obavljanje administrativnih, pomoćnih i drugih poslova, te praćenje i sprovođenje zadataka i prijedloga članova Komore, saradnju rada sa ostalim Komorama i relevantnim institucijama, Komora ima Stručnu Službu Komore.

Član 58.

Organizacija Stručne službe, kao i broj i struktura članova Stručne službe treba odgovarati potrebama i zahtjevima Komore, te omogućiti stručno, kvalitetno, provedbeno i odgovorno izvršavanje zadataka i odluka Komore utvrđene ovim Statutom i ostalim aktima Komore i njenih organa i tijela.

Član 59.

Stručna služba prati, proučava i analizira društvena i privredna kretanja od značaja za obrtništvo i malo poduzetništvo.

Stručna služba priprema informacije, analize i nacрте akata nužne za funkcionisanje i rad organa i tijela Komore.

Stručna služba pruža stručnu i svu drugu neophodnu pomoć članovima Komore kada se radi o pitanjima koja obuhvataju rad Komore.

Pravilnik o organizaciji Stručne službe donosi Upravni odbor, a rad Stručne službe i provedbu povjerenih zadataka nadzire sekretar Komore.

Član 60.

Stručna služba prima sve primjedbe, prijedloge, sugestije, prijave i inicijative članova Komore isključivo u pismenoj formi koji su vezani za zaštitu obrtništva i obrtnika u skladu sa Zakonom i ovim Statutom.

Član 61.

Stručna služba Komore koordinira rad između Komore, nadležnih organa vlasti i ostalih registriranih asocijacija obrtnika, a u cilju unapredjenja obrta u cjelini.

Član 62.

Stručna služba Komore vodi evidenciju registriranih obrtnika- zanatlija i lica koja obavljaju srodne djelatnosti i usklađuje sa Obrtnim registrom FBiH.

XII. OBRAZOVANJE I OSPOSOBLJAVANJE ZA OBAVLJANJE OBRTA

Član 63.

Komora preuzima sve neophodne radnje oko organizovanja i sudjelovanja u izradi odgojno - obrazovnih programa za izučavanje obrta.

Komora izdaje dozvole - licence za izvođenje praktičnog dijela obrazovanja na osnovu važećih zakona.

Komora radi na usavršavanju obrtnika, organizuje polaganje majstorskih ispita u saradnji sa odgovarajućim srednjim stručnim školama.

Komora podstiče dualni sistem obrazovanja i uvođenje savremenih informatičkih metoda kod izučavanja obrta.

Komora daje prijedloge za planiranje mreže obrtničkih škola i njihovih programa vodeći računa o potrebama za pojedinim djelatnostima kod izučavanja obrtničkih zanimanja.

XIII. FINANSIRANJE KOMORE

Član 64.

Sredstva za rad Komore osiguravaju se iz članarine, kotizacija, prihoda od imovine, naknada za usluge, partnerskih projekata, poklona, donacija i drugih izvora u skladu sa Statutom i drugim aktima Komore, te zakonom koji donese Vlada F BiH i Vlada Kantona Sarajevo, na osnovu programa za : «podsticaj razvoja poduzetništva» pri nadležnim ministarstvima.

Član 65.

Prihodi i rashodi Komore određuju se finansijskim planom Komore koji usvaja Skupština u skladu sa Zakonom i Statutom na prijedlog organa i tijela Komore.

Član 66.

Ukoliko do kraja tekuće godine ne bude donosen finansijski plan Komore, Upravni odbor donosi odluku o privremenom finansiranju Komore za prvo tromjeseče naredne godine u skladu sa zakonskim propisima.

Član 67.

Završni godišnji račun izrađuje ovlašteni knjigovođa ili drugo ovlašteno lice odnosno agencija za pružanje knjigovodstveno-računovodstvenih usluga, kontrolu istog vrši Nadzorni odbor i isti u formi izveštaja prihvata Skupština OKKS. Skupština OKKS može uvijek na svojim sjednicama, kada smatra da je to potrebno, zatražiti uvid u završni godišnji račun u njegovo materijalno i finansijsko stanje.

Član 68.

Komora je obavezna završni godišnji račun podnijeti na kontrolu nezavisnoj instituciji izvan OKKS, ovlaštenoj za obavljanje te djelatnosti u skladu sa pozitivnim zakonskim propisima.

XIV. PRELAZNE I ZAVRŠNE ODREDBE

Član 69.

Za izradu prijedloga akata, pravilnika i poslovnika, te iznalaženje ostalih pravnih rješenja u skladu sa Zakonom, zadužena je Stručna služba Komore koja zajedno sa sekretarom učestvuje u izradi istih.

Član 70.

Za izradu programa rada, izradu prijedloga programa, Ugovora, te iznalaženje ostalih rješenja u skladu s zakonom zadužena je Stručna služba Komore.

Član 71.

Udruženja obrtnika koja se osnivaju na području Obrtničke komore Kanton Sarajevo, obavezna su pribaviti pismenu saglasnost na osnivački akt od strane OKKS.

Član 72.

Za tumačenje pojedinih odredbi Statuta ovlašten je Upravni odbor, a za sprovođenje odredbi ovog Statuta odgovoran je predsjednik Komore.

Član 73.

Za sve što nije regulisano ovim Statutom, primjenjivat će se Zakon o obrtu i srodnim djelatnostima.

Član 74.

Ovaj Statut, u skladu sa Zakonom o obrtu i srodnim djelatnostima, usvojila je Skupština Obrtničke komore Kantona Sarajevo, na sjednici održanoj dana 21.03.2015. godine.

Odlukom broj: 02-05-7331-7/15 od 07.05.2015. godine, Vlada Kantona Sarajevo je dala saglasnost na Statut Obrtničke komore Kantona Sarajevo.

Ovaj Statut stupa na snagu danom objavljivanja u "Službenim novinama Kantona Sarajevo".

u Sarajevu, 21.03.2015.

Predsjednik Skupštine
